

Uunga siunnersuut: Gassileriviit, gassinut atortut aamma akuersissuteqarnissamut piumasaqaatit pillugit Inatsisartut inatsisaat xx, yy 2015-imeersoq.

(Avatangiisinut, Pinngortitamut Inatsisinillu Atuutsitsinermit Naalakkersuisoq)

Saqqummiussissut

(Avatangiisinut, Pinngortitamut Inatsisinillu Atuutsitsinermit Naalakkersuisoq)

Siullermeerneqarnera

Inuiaqatigiinni najukkatsinni sumiiffinni assigiinngitsorpassuarni gassileriveqarpoq: Atuarfinni, igaffinni, neriniartarfinni allanilu. Gassileriviit peqqissutsimut inuiaqatigiinnilu pigisanut naleqartunut annertuumik ulorianartorsiorfitsinnaapput. Gassimik seerisoorneq aammalu gassimik tamakkiisuunngitsumik ikuallaanermit aniasoorneq toqunartumik sunnerneqarnermik ipinermillu kinguneqarsinnaapput. Gassilerivinnit kukkusumik sananeqarsimasunit tamanna pilersinnaavoq. Tamatuma saniatigut gassi ikuallajalluinnartuuvoq, ikuallannermik gassimillu qaartoornermik pilersitsisinnaalluni.

Inatsisissatut siunnersuummi gassilerivinnut atatillugu inuit inuiaqatigiillu pigisaasa nalillit isumannaallisaanikkut peqqissutsikkullu ulorianartorsiorfiusunut ilaatigut gassileriviit atortuisa sananeqarsimasut pitsaassusiinik qaffaanikkut illersorneqarnissaasa siuarsarneqarnissaa siunertarineqarpoq.

Gassilerivinnut suliassa qarfinni allagartamik akuersissummik pigisaqarnissamut piumasaqaammik atulersitsinissaq inatsisissatut siunnersuummi sunniiniutissatut pingaarnersaavoq. Allagartamik akuersissummik pigisaqarnissamut piumasaqaammi inuit suliffeqarfiillu, gassimut atortulersuutunik suliaqartut teknikkikkut piginnaasanik ilisimasanillu pisariaqartinneqartunik pigisaqarnissaat qulakkeerneqassaaq.

Taamaalilluni gassimik suliaqarnissamut allagartamik akuersissummik peqarnissamik aaqqissuussinermit, gassilerinermit atortulersuutit atorlugit niueruteqarnermi pissutsinik pitsaanagerusunik pilersitsinissaq siunertarineqarpoq. Tamanna VVS-ilerinermit suliaqartunit ujarorneqarpoq, taamaattumillu inatsisissatut siunnersuut atuisunut inuussutissarsiortunullu iluaqutaassaaq.

Inatsisissatut siunnersuut ikaarsaarnermut aaqqissuussinermit imaqarpoq, tamatumalu kingunerisaanik inatsisissatut siunnersuut akuerineqassappat allagartamik akuersissummik pigisaqarnissamut piumasaqaat aatsaat 1. januar 2017-imi atuutilissaaq. Suliffeqarfiit inuillu gassilerivinnik suliaqartut allagartamik akuersissummik pissarsinissamut piffissaqartinneqarnissaat siunertarineqarpoq.

Siunissami allagartamik akuersissummik pissarsigaanni, gassilerinermit teknikkimut pikkorissarneq angusiffiusimassaaq. Kalaallit Nunaanni Innaallagisserinermit Oqartussaasut allagartamik akuersissummik pissarsinissamut piumasaqaatinut maleruagassanik sukumiinerusunik aalajangersaanissamut piginnaatinneqassapput.

Tulliatut inatsisissatut siunnersuummi Kalaallit Nunaanni Innaallagisserinermit Oqartussaasut gassilerinermit malittarisassanik, gassimut ikkussukkat qanoq suliarineqartarnissaat pillugu malittarisassanik imalinnik, suliaqarnissamut piginnaatinneqassapput. Gassilerinermit teknikkimut suliassa qarfinni ullumikkut nunani tamalaani pitsaassusissat annertuumik tunngavigineqarput, aammalu Kalaallit Nunaata ineriartornermit tassunga malinnaanissaa pingaaruteqarpoq.

Taamaalilluni Kalaallit Nunaata gassilerinermit teknikkimut suliassa qarfinnut naleqquttumik inatsiseqarnissaa inatsisissatut siunnersuummi pingaarnertut qulakkeerneqassaaq.

Taamatut oqaaseqarlunga inatsisissatut siunnersuut Inatsisartuni kajumittumik suliassanngorlugu tunniuppara.